

«Star da la vart n'è nagina opziun»

La neutralitad da la Svizra è vegnida messa en dumonda al Forum economic mundial (WEF) a Tavau. Plinavant èn activists dal clima – tranter auters era Greta Thunberg – vegnids a Tavau.

SDA/FMR

Tenor il president da la Confederaziun *Alain Berset* saja la neutralitad da la Svizra vegnida bain chapida al WEF. El haja pudì declerar che la neutralitad da la Svizra na saja betg dischinteress, ha ditg Alain Berset la gievgia avant las medias a Tavau. El na craja betg che la Svizra sa fetschia culpabla, perquai ch'ella na furneschia betg armas. «La Svizra ha da giugar ina rolla speziala», uschia Alain Berset. Quai saja vegnì chapì bain dals auters pajais.

Mess en dumonda la neutralitad Svizra

Diversas persunas han mess en dumonda la neutralitad da la Svizra al WEF a Tavau. Da star da la vart na saja nagina opziun, ha ditg per exempel la presidenta da la cumissiun da l'UE *Ursula von der Leyen*. Ella ha dentant concedì che la decisiun davart l'approvaziun da furnir armas or da produenziun svizra a l'Ucraina saja a Berna.

Er il secretari general da la Nato *Jens Stoltenberg* ha appellà a «tuttas naziuns da suste-gnair militaricamain l'Ucraina».

Greta Thunberg fa respunsabel participants dal WEF per crisa dal clima

L'activista dal clima svedaisa *Greta Thunberg* ha crititgà las participantas ed ils participants da podi al WEF. Quai sajan las persunas, che procuran per la destrucziun dal planet, ha ella ditg. Ins duai enstagl tadlar quels umans «ch'èn effectivamain pertutgads da la crisa dal clima». Greta Thunberg ed autras activistas dal clima, tranter auter la Tudestga *Luisa Neubauer*, èn viagiadas a Tavau per surdar ina brev averta als managers dals gronds concerns d'energia.